

आकाशवाणी

खबरां जगमोहन शर्मा कोला

1. बिहार च सरकार बनाने गी लेइयै सियासी गतिविधियां तेज होई गेदियां न। जनता दल युनाइटेड विधायक दल दे लीडर अपना नेता चुनने लेई अज्ज बैठक ला करदे न।
2. उत्तर प्रदेश दे सोनभद्र जिले च इक खान दा हिस्सा धंसी जाने कारण इक जने दी मौत, अंदर फसे दे 10 कोला मते कर्मिं गी बाहर कड्डने दियां कोशिशं जारी।
3. छत्तीसगढ़ दे सुकमा जिले च सुरक्षाबलें कन्नै लग्गे दे इक टाकरे च त्रै माओवादी मारे गे न।
4. अमरीका नै भारत थमां आयात होने आहिलिं चीजें सने खाने-पीने आहिलिं केई चीजें पर टैरिफ च कटौती कीती ऐ।
5. ते टैस्ट क्रिकेट च कोलकाता दे ईडन गार्डन्स च खेडे गेदे द'ऊं टैस्ट मैचें दी श्रृंखला दे पैहले मुकाबले च दक्खन अफ्रीका नै मेजबान भारत गी त्रीं द्रौं कन्नै हराई दिता।

<><><><><><>

Bihar-Govt. Formation

बिहार च नमीं सरकार दे गठन लेई सियासी गतिविधियां तेज होई गेइयां न। विधानसभा चुनाएं च भारी जित हासल करने दे परेंत एन.डी.ए नै राज्य च सरकार बनाने पर ध्यान केंद्रित कीता ऐ। केंद्री मंत्री ते लोक जनशक्ति पार्टी (रामविलास) दे प्रधान चिराग पासवान, हिंदुस्तानी अवाम मोर्चा दे प्रधान संतोष सुमन ते केई होर लीडरें कल पटना च जनता दल युनाइटेड दे प्रधान ते बिहार दे मुखमंत्री नितिश कुमार हुं'दे कन्नै मलाटी कीती। बैठक दरान सरकार दे गठन बारे औपचारिक चर्चा होई। जनता दल युनाइटेड दे कार्यकारी अध्यक्ष संजय झा ते केंद्री मंत्री राजीव रंजन सिंह उर्फ लल्लन सिंह होरें बी कल संझा नमीं दिल्ली च भारती जनता पार्टी दे सीनियर लीडर ते गृह मंत्री अमित शाह हुं'दे कन्नै मलाटी कीती। दस्सेआ जा'रदा ऐ जे बैठक दरान नमीं सरकार दे गठन दी प्रक्रिया बारे शुरूआती गल्लबात कीती गेई। जनता दल युनाइटेड दी अज्ज होर बैठक लग्गै करदी ऐ जेहदे च पार्टी अपना विधायक दल दा नेता चुनग।

<><><><><><>

## Mine-Caved

उत्तर प्रदेश दे सोनभद्र जिले च जंदी राती इक खान दे इक हिस्से दे धस्सी जाने कारण उत्थै फंसे दे कोई इक दर्जन कर्मिं गी बाहर कड्डने दे जत्न बरोबर जारी न। इस घटना च 1 बजे दी मौत होई दी तस्दीक होई चुकी दी ऐ ते बाकिं गी बाहर कड्डने लेई एन.डी.आर.एफ. ते एस.डी.आर.एफ दियां बचाव टीमां युद्ध स्तरै पर कम्मै पर लग्गी दियां। केई सीनियर अधिकारी मौके पर मजूद न ते कार्रवाई पर नेइमी तक्क रक्खा करदे न। अतिरिक्त डीजीपी पीयूष मोरदिया होरें मीडिया गी जानकारी दिती ऐ जे बिल्ली मारकुंडी ग्रांस च कृष्णा खाने दा इक हिस्सा धस्सी जाने कारण एह घटना पेश आई।

<><><><><><>

## Pakistan-UNHCR

संयुक्त राष्ट्र दे शरणार्थियें सरबंधी हाई कमिशन नै आखेआ ऐ जे पाकिस्तान नै पैहली जनवरी थमां नवंबर 2025 दे दरम्यान 1 लक्ख शा मते अफगान बसनीकें गी हिरासत च लैता ऐ ते इन्दे चा मती सारी गिरफ्तारियां बलूचिस्तान दे चगाई ते क्वेटा जिलें ते पंजाब थमां कीतियां गेइयां न। हाई कमिशन नै आखेआ जे हिरासत च लैते गेदे लोकें चा 76 फीसद अफगान बसनीक कार्डधारक जां बिजन दस्तावेज आहले प्रवासी हे। कई मनुक्खी संगठनें पाकिस्तान गी आखेआ जे ओह इस गल्लै गी यकीनी बना जे इनें लोकें गी वापसी अंतरराष्ट्री जिम्मेवारियें दे मुजब होऐ।

<><><><><><>

## Maoists-Killed

छत्तीसगढ़ दे सुकमा जिले च सुरक्षाबलें इक टाकरे दरान त्रै माओवादिएं गी मारी मकाया ऐ। इन्दे च 2 महिला विद्रोही बी शामिल न। पुलसै मुजब जिले दे तुमालपाड़ इलाके च किश माओवादिएं दी मौजूदगी बारै थहोई दी इक सूह दी विनाह पर कार्रवाई करदे होई सुरक्षाबलें इलाके गी घेरियै तुपाई अभियान चलाया जिस दरान भखे दे टाकरे च त्रै लोथां बरामद करी लैतियां गेदियां न।

<><><><><><>

## Delhi-AI Falah FIR

दिल्ली क्राइम ब्रांच नै अल फलाह युनिवर्सिटी दे खलाफ दो बक्ख-बक्ख एफ.आई.आर दर्ज कीतियां न। इक एफ.आई.आर धोखाधड़ी दे मामले च ते दुई जालसाजी सरबंधी धाराएं तैहत दर्ज कीती गई ऐ। दिल्ली पुलिस दे इक सूत्र मुजब क्राइम ब्रांच दी इक टीम नै कल राश्ट्री

राजधानी च ओखला इलाके च अल फलाह युनिवर्सिटी गी नोटिस बी जारी कीता ऐ ते उंदी थमां किश दस्तावेज मंगे न। पुलस नै आखेआ ऐ जे युनिवर्सिटी ग्रांट कमिशन ते नेशनल असेसमेंट ते एक्रिडिटेशन काउंसल आसेआ कीती गेदी समीक्षा दरान युनिवर्सिटी च गंभीर गड़बड़िये दा पता लग्गने मगरा एह एफ.आई.आर दर्ज कीती गई ऐ।

<><><><><><>

### IED-Rajouri

सुरक्षाबलें कल जम्मू-कश्मीर सरहदी जिले राजौरी थमां इक्क आई.ई.डी बरामद कीता जिसी मगरा इक नियंत्रित धमाके च तबाह करी दिता गेआ। आकाशवाणी जम्मू दे संवाददाता नै जानकारी दिती ऐ जे थन्नामंडी सब डिविजन दे अप्पर बंगई ग्रांs च कीते गेदे इस धमाके करी इक मकान गी आंशिक तौर पर नुकसान पुज्जा ऐ। अधिकारिये मुजब सुरक्षाबलें दे इक गश्ती दल गी इक घरे दे कोल आई.ई.डी बरामद होआ हा जेदे मगरा बम नकारा करने आहले दस्ते गी उत्थे सददेआ गेआ जिन्नै नियंत्रित ढंगे कन्नै उस आई.ई.डी गी धमाका करिये तबाह करी दिता।

<><><><><><>

### US-Tarrif

अमरीकी राष्ट्रपति डॉनल्ड ट्रम्प होरें मुट्टे मास, काफी ते फलें समेत खाने-पीने आहिले कई चीजें पर अरिफ च कटौती कीती ऐ जिंदे च भारत थमां अमरीका भेजे जाने आहले अम्ब, अनार, चाह-पत्ती ते मसालें पर बी टैक्स घट्ट होने दी मेद ऐ। व्हाइट हाउस दा आखना ऐ जे एह कार्रवाई बपार समझौते गी ध्यानै च रखदे होई कीती गई ऐ जेदे नै अमरीकी निर्यात गी बढ़ावा थहोग ते महंगाई पर काबू पाने च मदद होग।

<><><><><><>

### Afghanistan-Trade

पिछले म्हीने बन्ने पर होई दिएं झड़फ्फे दे बाद अफगानिस्तान पर निर्भरता घट्ट करने लेई ईरान ते मध्य एशियाई देशें कन्नै बपार बधा करदा ऐ। अफगानिस्तान पाकिस्तान दिएं सीमाएं पर उप्परोतली आवा'रदिएं रूकावटें कोला बचने लेई ईरान दे चाहबहार बंदरगाह दा इस्तमेल करा करदा ऐ। अफगानिस्तान दे उद्योग ते बपार मंत्रालय मुजब ईरान कन्नै बपार पाकिस्तान कन्नै 1 अरब 10 करोड़ 80 लकख डालर दे मकाबले पिछले 6 म्हीने ईरान कन्नै बपार 1 अरब 62 करोड़ 60 लकख डालर धोड़ी पुज्जी गेआ ऐ। मंत्रालय दे अधिकारिये दस्सेआ जे बक्ख-बक्ख बपार रस्ते आयात-निर्यात गी स्थिर रखने लेई जरूरी ऐ। अफगानिस्तान दे उप-

प्रधानमंत्री मुल्ला अब्दुल गनी बरादर नै पाकिस्तान कन्नै मजूदा तनोतनी दे बावजूद माल समेयान भेजने दी प्रक्रिया गी यकीनी बनाने लेई मतवादत रस्ते दी जरूरत पर बी जोर दिता ऐ।

<><><><><><>

### Army Commander

फौज दी उत्तरी कमान दे कमांडर लेफ्टिनेंट जनवर प्रतीक शर्मा होरें उधमपुर जिले च आतंकवाद रोधी ग्रिड दा जायजा लैता ते सभनें फौजी अधिकारिये ते जवाने गी आखेआ जे ओह लगातार सौहगे-सतर्क रौहन तां जे खिते च पैदा होने आहली चुनौतिये दा असरदार ढंगे सिर कन्नै मुकाबला कीता जाई सकै। फौजी कमांडर होरें इस दरान बसंतपुर ते रामपुर इलाके दा दौरा लाया जित्थे पिछले किश ब' रें दरान कई आतंकवादी घटनां पेश आइयां न। इस मौके पर उनें फौजी जवाने कन्नै गल्लबात बी कीती ते जम्मू-कश्मीर गी आतंकवाद शा मुक्त रखने दी बचनबद्धता ते पेशेवराना रौंs लेई उंदी सराहना कीती।

<><><><><><>

### PM-Bulet Train

प्रधानमंत्री नरेंद्र मोदी होरें इस गल्ला पर जोर दिता ऐ जे जिसलै देशे लेई कम्म करने ते किश नमां करने दी भावना पैदा होंदी ऐ तां एह बड़ी बड्डी प्रेरणा दा स्रोत बनी जंदी ऐ। श्री मोदी होरें एह गल्ल कल सूरत च भारत दी पैहली बुलेट ट्रेन परियोजना दी समीक्षा दे बाद आकखी। उनें इस परियोजना दी प्रगति दे बारै जानकारी लैती जेदे च रफ्तार ते समे-सिरिणी दे लक्ष्ये दी पालमा बी शामिल ऐ। इस मौके पर केंद्री रेल मंत्री अश्विनी वैशणव बी उत्थे मौजूद हे।

<><><><><><>

### Lal Qila Metro

दिल्ली मेट्रो लाल किला स्टेशन दे सब्बे गेट हून यात्रिये लेई खोल्ली दिते गे न। लाल किला मेट्रो स्टेशन गी इस म्हीने दी 10 तरीक गी लाल किले कश कार धमाके दे बाद सुरक्षा कारणे एहतियात दे तौरा पर बंद करी दिता गेआ हा।

<><><><><><>

### PIB-Fact Chack

सरकार नै सोशल मीडिया पर प्रसारित इक्क वीडियो गी झूठा दस्सेआ ऐ जेदे च दावा कीते गेदा हा जे केंद्री वित्त मंत्री निर्मला सीतारमण इक्क नमी रास पूंजी लाने आहली स्कीम दा

प्रचार करा करदियां न जेदे च माहवार रिर्टन दा बाददा कीते गेदा ऐ। प्रेस सूचना ब्यूरो दे तथ्ये दी जांच करने आहली इकाई नै दस्सेआ जे एह वीडियो फर्जी ऐ ते ए.आई आसेआ तैयार कीते गेदा ऐ ते कन्नै गै सरकार नै इस चाल्ली दी कुसै बी स्कीम दा दावा नेई कीता ऐ। तोआई, सरकार नागरिके गी सौहगा कीता ऐ जे इस चाल्ली दिये निवेश स्कीमें दे झांसे च नेई औन।

<><><><><><>

### Perss-Day

मुल्ख भरे च अज्ज राश्ट्री प्रेस ध्याड़ा मनाया जा'रदा ऐ। एह ध्याड़ा देसै च लोकतंत्र गी तगड़ा बनाने च इक आजाद, जिम्मेदार, निरपक्ख ते जवाबदेह प्रेस दी भूमिका दी तसदीक करदा ऐ। अज्जे दे ध्याड़े 1966 च भारती प्रेस परिषद दी स्थापना होई ही जदूं उन्नै इक स्वतंत्र प्रहरी दे रूपै च कम्म करना शुरू कीता हा।

<><><><><><>

### Vaishnav Press Day

सूचना ते प्रसारण मंत्री अश्विनी वैशणव होरें आखेआ ऐ जे देश दे लोकतंत्र च प्रेस दी भूमिका बड़ी महत्वपूर्ण ऐ। राश्ट्री प्रेस दिवस दे मौके पर नमी दिल्ली च संवाददाताएं कन्नै गल्लबाट दरान श्री वैशणव होरें आखेआ जे प्रेस दी विश्वसनीयता गी बदाने ते भ्रम-भलेखा पैदा करने आहली खबरें कन्नै निब्बड़ने लेई ठोस गेई पुट्टियां जा' रदियां न। उनें इस मौके पर प्रेस ते मीडिया जगत च कम्म करने आहले सभनें लोके गी मुबारकबाद दिती। सूचना ते प्रसारण राज्यमंत्री डॉ. एल मुरुगन, मंत्रालय दे सचिव संजय जाजू ते भारती प्रेस परिषद दियां अध्यक्ष न्यामूर्ति रंजना प्रकाश देसाई बी उत्थे मौजूद हियां। न्यामूर्ति रंजना प्रकाश होरें अपने संबोधन च आखेआ जे पत्रकारिता सच्चाई, मजबूत बचनबद्धता ते पक्के धेड़यै दी मंग करदी ऐ। उनें आखेआ जे पत्रकारिता छड़ा इक्क पेश नेई ऐ सगुआं एह सच्चाई दी खोज ऐ। ध्यानजोग ऐ जे राश्ट्री प्रेस दिवस हर बरे 16 नवंबर गी मनाया जंदा ऐ। इस्सै ध्याड़े भारती प्रेस परिषद दी स्थापना होई ही ते परिषद नै 1966 च स्वतंत्र रूप कन्नै पत्रकारिता लेई चौथे थम्म आहला लेखा कम्म करना शुरू कीता हा।

<><><><><><>

### Vice Prez. Manorama News Maker Award

उपराश्ट्रपति सी.पी राधाकृष्णन होरें मीडिया दी अहम भूमिका पर बल दिंदे होई आखेआ ऐ जे मीडिया देशे दे विकास दिएं खबरें दे कन्नै नौजोआनें अंदर नमियां मेदां बी भरदी ऐ। नमी दिल्ली च मनोरमा न्यूज मेकर पुरस्कार 2024 दरान अपने संबोधन च श्री राधाकृष्णन होरें

आखेआ जे पत्रकारिता ओकड़े लोकें दी अवाज बनदी ऐ जेहड़े आपूं अपनी आवाज नेई पुट्टी सकदे। उनें समाज गी नशामुक्त बनाने ते जनहित च दिते गेदे व्याख्यानं गी दिशा देने च मीडिया दी सराहना कीती। इस मौके पर श्री राधाकृष्णन होंरें केंद्री पेट्रोलियम ते कुदरती गैस मंत्रालय ते श्रम ते रोजगार मंत्रालय दे राज्यमंत्री सुरेश गोपी होंरेंगी मनोरमा न्यूजमेकर पुरस्कार कन्नै सम्मानित कीता। उपराश्ट्रपति होंरें सिनेमा ते सियासत दौनें च गै कामयाब करियर लेई श्री गोपी हुंदी सराहना कीती।

<><><><><><>

### Cricket

कोलकाता दे ईडन गार्डन्स च 2 टैस्ट मैचें दी श्रृंखला दा पहला मैच दक्खन अफ्रीका नै मेजबान भारत गी 30 रन्जें कन्नै हराई दिता। दक्खन अफ्रीका आसेआ रक्खे गेदे 124 रन्जें दे लक्ष्यें दा पिच्छा करदे होई दुई पारी च भारत दी पूरी टीम 93 रन्जें पर आउट होई गई। भारती टीम 10 खडारियें कन्नै खेड्ढा करदी ही कीजे कप्तान शुभमन गिल कल खेड्ढा दरान गर्दन च लग्गने करियें मैच थमां बाहर होई गे हे। एहदे शा पैहले मेहमान टीम नै कल दे स्कोर 7 विकेटें दे नुकसान पर 93 रन्जें थमां अग्गे खेडदे होई होई दुई पारी च 153 रन्ज बनाए। दऊं मैचें दी श्रृंखला दे पैहले मैच च ईडन गार्डन्स दी पिच बल्लेबाजें लेई चुनौतिएं आहली साबत होई। दक्खन अफ्रीका लेई दुई पारी च बिजन आउट होए दे तेम्बा बावुमा नै शानदार 55 रन्जें दा जोगदान दिता।

<><><><><><>

### Sabrimala-Temple

केरल च एतिहासिक सबरीमाला मंदर गी अज्ज संझा सलाना मंडल मकर विलक्कू यात्रा रूतै लेई खोल्ली दिता गेआ। इक प्हाड़ी पर स्थित इस मंदरै च इस यात्रा दरान लक्खां बद्दे श्रद्धालुएं दे पुज्जने दी मेद ऐ जेहड़े दूरां-दूरां आध्यात्मिक ज्ञान हासल करने लेई औंदे न।

<><><><><><>

### Jitender Unity March

सरदार वल्लभ भाई पटेल हुंदी 150मीं जयंती दे उपलक्ष्य च प्रधानमंत्री नरेंद्र मोदी थमां प्रेरित होइये अज्ज कठुआ जिले दे रामकोट छल्लां ते गलक इलाकें च अखंड भारत दे सनेअ गी समर्पित एकता मार्च सरदार @ 150 दा सरिस्ता कीता गेआ। इस मौके मार्च च शामिल होए दे केंद्री मंत्री डॉ. जितेंद्र सिंह हुंदा भाजपा कार्यकर्ताएं ते आम जनता नै गर्मजोशी कन्नै सोआगत कीता। एह मार्च 26 नवंबर 2025 तगर लगातार जारी रौहगा। बिलावर थमां विधायक सतीश

शर्मा हुंदी नुमायंदगी च आयोजित कीते गेदे इस मार्च च बड़ी मती गिनतरी च मकामी लोकें शिरकत कीती।

<><><><><><>

### Midnight Marathon

जम्मू-कश्मीर खेड्ढ काउंसल आसेआ रियल टाइम स्पोर्ट्स दे सैहयोग कन्नै आयोजित कीती गेदी जम्मू मिड नाइट मैराथन कल रातीं ते अज्ज बड्डलै जम्मू च कामयाबी कन्नै मुकम्मल होई। इस मैराथन च प्रतिभागियें 2 गेडें च द्रौड़ लाई जिंदे च बड़ी मती गिनतरी च धावकें सेहत, खेड्ढ भावना ते आपसी हिरख-प्रेम आहली भावना दा प्रदर्शन कीता। आकाशवाणी दे जम्मू संवाददाता दी रिपोर्ट मूजब, मैराथन दे आयोजकें आखेआ ऐ जे एहदा मकसद सेहतमंद जीवनशैली गी बढ़ावा देना ते खेड्ढ प्रेमियें गी इक्क सांझे मंच पर आहनना हा। एह मैराथन मौलाना आजाद स्टेडियम थमां षुरू होइयै शैहरा दे बक्ख-बक्ख इलाकें चा होइयै लंग्घी। 42 किलोमीटर ते 21 किलोमीटर आहली मैराथन द्रौड़ें गी जंदी रातीं साड्डे 11 बजे शुरू करवाया गेआ जिसलै के 10 किलोमीटर ते 5 किलोमीटर आहली द्रौड़ें अज्ज बड्डलै 5 बजे शुरू होइयां।

<><><><><><>